

四庫全書

集部

欽定四庫全書

曝書亭集卷七十七

翰林院檢討朱彝尊撰

墓誌銘

四

朝議大夫戶科給事中降補國子監學正趙君

墓誌銘

君諱吉士字天羽一字恒夫姓趙氏世居徽州之休寧
仕為光祿寺丞諱廷賢者君曾祖考也贈昭武將軍諱

完壁者祖考也

封文林郎進階奉直大夫

贈朝議大夫諱時腴者考也妣汪氏累

封恭人

贈淑人君入籍杭州補府學生順治八年舉浙江鄉貢
進士康熙七年謁選知太原交城縣事縣居萬山中巖
磴參錯孔河出塔莎谷東南流會于汾故水曰交水山
曰交山縣曰交城地近屈產畜馬絕有力又饒灌木歲

取其材以為利君至日民間牧馬有禁上官廢南堡村
木廠許沿河市賣由是利為文水商民所奪交人重困
往往去為盜依山負固散則民聚則寇勢方張旁掠清
源汾陽邢臺三縣君思翦除之首閱武於郭南令下士
卒進退有序捐萬錢犒馬還語賓從曰民可用也會年
饑君錄餓者七十人完解舍垣牆使家人與處詢羣盜
出沒所在多得其實爰申明乘墉保甲團練之法君乃
言曰凶歲良民易迫為盜吾當撫之遂詣河北都行荒

政諭山農毋為盜所脅日暮留宿陶穴詰朝相度蹊徑
通塞村砦近遠知最險者三坐崖東西兩葫蘆川繞其
下塞葫蘆口則官軍不得進保三坐崖則官軍不克登
君默識之而還十年十月朔總督檄縣進勦君行令山
麓葺靜安堡期以月幾望官兵進屯先七日置酒城隅
却月湖張樂于舫許老稚夾岸縱觀越宿復要崑山顧
炎武華亭陸慶臻上海蔡湘翦燭賦詩密誠司夜者促
更籌于子刻打五鼓君起送客出郭則守備姚順等已

先受約統步騎兵四百集南關外矣疾行四十里饗士
卒于水泉灘別為三隊並進入兩葫蘆川據三坐崖賊
鳥獸散散復合且戰且奔官軍分搜巢窟先後獲魁渠
二十二人餘或降或自剄君別淑慝召山農終始不作
賊者三十七家賚以羊酒其素不當夫徭者千四百三
十家編其籍入都圖入山旬有六日交山之寇悉平君
治交五載餘修圖經新橫舍立倉廩定軍營折疑獄罰
贖鍰使種柳鑿山通龍門渠溉田十萬四千頃又力請

上官復南堡村木廠秣善馬於驛士飽馬肥用降賊攻賊故能成功巡撫上其狀徵入為戶部山西司主事居母憂還籍服除補戶部河南司主事載丁父憂起復補戶部四川司主事十四年

覃思由文林郎進奉直大夫二十年奉使徵揚州關鈔君寬以惠商負販乘舢舨出入者暨免譏察輸稅者俾自封投櫝中胥吏科歛之弊盡革復

命監督通州中南倉旋入會典館奉

敕排纂鹽漕二書二十三年

誥授朝議大夫明年戶部尚書科爾坤上言賦役徵解
條目太繁請更造簡明全書

天子允其請開局山西司君充纂修官時總裁光祿寺
卿龔佳育持議謂州縣催科歲發由單分壤地之則使
民知輸納之數法之善也惟因畿輔撥補地畝歲有更
易而江浙稅課起運存留條目繁瑣近例有司必合計
州縣之田刊入由單尾數稍有不符動行駁改名為易

知在百姓實難知請米數止升合勺銀數止分釐毫自
秒撮細忽以下悉刪除之而升秒為勺升絲為毫斯勘
算易明賦額仍無虧損乃更定由單式式未定而佳育
卒計部在官人胥動浮言以畸零數不可除古未有議
刪去者朝士多惑其說於是給事中楊周憲特疏請勿
更

天子下公卿議君作論一篇援唐元稹當州所上狀中
云斛止於合錢成於文在百姓納數元無所加于官司

簿書永絕姦詐是則昔人已昌言之且米有圭粟粒黍銀有微塵纖沙入之權量莫辨其形鏤諸槃棗徒繁其目況會計凡析一為二者悉數之不能終窮佳育議是事雖不果行盈庭莫能難也又明年

天子需爭臣試三十三人于

保和殿擢君戶科給事中君上言會典與紅本相表裏故事內外章奏付內閣典籍廳儲藏歲久無隙地因貯科房往往散佚又各部司簿錄有第載國書未譯漢文

者除二十五年前已經纂輯外宜滿漢對譯彙送內閣
以為異日續修地

天子允行既而銜

命勘河還臺班緣事被議落職補國子監學正君好學
善與人交夙有知人之鑒分校山西鄉闈拔馮給事雲
驢又賞識錢府尹晉錫汪編修灝于未遇時每當賦詩
酬和衮衮不休疊一韻至萬首所居寄園考定為月張
園故址濬池累石分布亭館種花木海內名士入都恒

留連不忍去君脫略禮數過者不知何者是客也所著書有續表忠紀寄園寄所寄錄音韻正謠徽州府交城縣志詩彙尤多俱鏤板行世若交山平寇本末則其友吳興夏駟紀其事為一書君年七十有九終于京師卒之歲康熙四十五年二月朏也娶汪氏

誥封恭人子三人道欽貢生候選儒學教諭景從山東布政司參議分守濟寧道景行康熙丁卯舉人內閣辦事中書舍人女一嫁國子監生戴嘉猷孫男一十二人

繼掄歲貢生繼林康熙己卯舉人畢元附學生抗繼撰
國子監生餘幼未注士籍女九人曾孫四人君之歸喪
也景從先卒景行卜地于某原葬有期矣來請銘嗚呼
君才傑也宰百里之邑積年未靖之寇犯虎狼之穴剗
除之其智勇有不可及者而又詳於政典使久居諫垣
言天下事閭閻惻惻何必不如古人乃以微罪去位一
官左謫徒令仰屋梁著書以老不亦可惜也夫銘曰
宰山城枹鼓鳴探赤丸吏不驚去劇賊枹鼓息陟考堂

譽超特入諫垣進讜言官雖左賓滿筵酒百船詩萬篇
留述作通都傳伊人逝孰譚藝音徽亡哀輓繼筮兆基
作銘詩訂君實無諛辭

鄉貢進士魏君墓誌銘

君諱坤字禹平別字水村世居嘉興之魏塘今之嘉善
縣也曾祖考某祖考某考某雖不仕鄉黨稱善人從祖
吏科都給事中大中忤奄寺受蒙蔽刑死詔獄世父學
沂以哀毀卒苦次故言忠孝門者首魏氏君十齡草今

文弱冠兼攻古文詩詞家有田二十畝不足供饘粥父喪除游京師入太學京師貴人延君授經教其子既而客中吳興嘉定陸徵君元輔海寧陸處士嘉淑訂忘年之款詩詞日益工尋就試橋門撰石鼓賦國子師交賞擊以為絕倫也屢試有司不利乃託跡賓幕東游歷下謁孔林南入楚粵西游彭蠡淹豫章年五十有四始舉鄉貢進士兩與計吏偕赴禮部仍下第歲乙酉復書驢券北上以歲除前一日抵真定之南關寒甚擁爐捉酒

乍飲三爵聞一噉而君逝矣太守寶應劉君中柱君之
故人也哭君于簣下質明視其斂含載以輜車歸其喪
于是君之子錫琦錫璉將葬君于遷善鄉之東蚤圩凶
服來請銘嗚呼君之學叩之而不窮其修辭動中事會
所填樂章被歌管悉合于律宜其有浙西才士之日舉
于鄉謂晚且達矣乃反速之死于道路天乎人乎若其
持己正臨財廉非其道一介不以入懷非其人近乎臆
而不污可謂有君子之守也已君生于某年月日卒于

金華縣志卷十七
某年月日享年六十先娶陳氏繼娶王氏有子二人孫男四人女二人所著有倚晴閣詩鈔秦淮雜咏厯山唱酬集粵游記程詩水村琴趣多行于世銘曰

魂兮歸來北方不可以久留些反葬于鄉樂哉斯丘些將詩可傳抑又何求些

歲貢生程君墓誌銘

歙縣程君諱浚字葛人一字肅菴通經史百家之言寄籍杭州府仁和縣學官弟子屢試不利以歲貢入國子

監居歛之岑山山形鐵峻特立新安江中為一鄉屏幃
君董工治樓榭繚以垣牆守望相助草竊莫敢窺又新
宗祠以睦姻合族姓通其有無少出嗣世父晨餐夕膳
事二人盡歡且眷戀所生終身孺慕親亡以兩房考妣
合葬于一塋築丙舍墓旁歲時臘臘禮拜上食如生存
榜曰侍初堂友愛昆弟無間言交友重然諾不因燥濕
輕重能為人釋紛嘗陳亭戶疾苦於

至尊前顏色不少懾里居逢寇警率鄉勇防禦寇退官

軍牧馬于郊村民供芻茭不繼君言于主帥旋師客安
吉茶陵兵變有司苦無備君從容代為區畫上官允其
議城得全君歸理家務然不廢學兩淮都運司志自徐
鵬舉朱廷立後續者無人君分門編輯頗挈其要暇輒
治方藥療有疾者所活甚多以是閭閻無貴賤咸稱君
善人君以明崇禎十一年十一月日生卒于康熙四十
三年十月日享年六十有七曾祖某祖某考某本生考
某均不仕娶吳氏子四人長喈中康熙己丑進士次啓

次哲俱候選州同知次鳴國子監生女一人嫁國子監
生汪琮孫男八人女六人君既卒歛諸生百二十有七
人合辭請以君入鄉賢祠下上之論交孚乃設粟主送
入祠將葬君之季子鳴請予銘其墓銘曰

不以為人後而孝哀於親不以身不仕而善誨諸人庸
言訕訕庸德循循祀馨宗兮黷序卜吉壤兮桑津若稽
古昔庶追蹤于叔度元考之倫也乎

嘉定張君墓誌銘

嘉定張雲章既合葬考妣于先世之兆率諸弟乞秀水朱彞尊銘其藏雲章才士也以貧游京師適貴人館願得生稱弟子不應歸謁節使思強其在門終不應也是屢試有司不利歸愈貧然其守已益嚴義利之辨動以古人為師自事親而外孝養祖考妣盡子職蓋張氏世以孝友聞由來遠矣志之曰君諱履素字子旦一字雲來七齡喪母父提授以四子書通一經工楷書弱冠補縣學生事繼母如母友愛諸弟田產僮僕恒推與之

娶李孺人武英殿中書舍人允新之女嫺壺行君喜得
內助晨羞夕膳克承二人歡魚菽之祭歲時以禮舍人
嘗以珠二索計百顆遺君大者重一銖君初不審視孺
人亦不以耀首也會君坐奏銷逋賦尾數未輸除名悵
鬱不自得年四十四病卒孺人教諸子力學躬治紡車
修祀事逾謹曰祭大事吾冢婦也其可忽諸賓客至必
供雞黍舍人珠既封完屢空間以內無交謫語雲章生
時孺人夢大星墜於懷占者曰後必顯久而名不登仕

籍孺人安之曰命也君沒後孺人力持門戶四十餘年以康熙四十六年月日終孺人有子五雲章雲蔚國子監生雲從雲揚縣學生雲縉業儒女子一贈孺人壻內閣中書舍人朱文龍孫男一十六人女八人曾孫女三人銘曰

凡民喪度丘隧墓大夫正其位張南渡徙姑胥稱萬戶江橋居依仁鄉橫港里祖居中昭考妣卜習吉筮協從銘貞石埋桑東

歲貢生潘君墓誌銘

鄉貢進士烏程潘麟舍舟謁予蹲賓橋畔請銘厥考之墓問其門世居縣之匯沮里高祖可賢奉政大夫知合州事與兄太子少保工部尚書季嗣同舉于鄉者也曾祖某祖某考某均不仕問其出處少補學官弟子晚充歲貢生職當授儒學訓導未銓問其年生崇禎七年月日卒于康熙四十三年月日問其撰述何書則有易解春秋傳考家禮小學外篇天文星野辨方輿歷法錢法

鹽法備荒法諸書律呂志河渠考花月田家歷東齋隨筆又以儀禮經傳通解經朱子草創未成足本思取先後鄭氏孔氏賈氏王氏衛氏敖氏諸家會粹為五禮條目繁重一手未果論定也富哉立言矣乎今士習日下由山長既廢司教者罕得其人槩果少年目不識九千字擁臯比秉木鐸師嚴道尊之謂何惜也君之學術經六藝緯三才未沾一命以樂育多士天實為之嗚呼悲夫君之學一主乎敬行事必告祠墓與朋友交長筵廣

席衆或謹叟侍者見其以手畫膝作敬字人或負已無
愠容施于人無德色言必踐善必躬行嘗論學于家其
子問朱陸異同優劣君曰學者宜收拾身心慎勿道聽
塗說業日修得失自見先儒優劣辨之不差毫釐與我
何涉耶其于門弟子請業亦未嘗高談性命也生平敦
睦同氣善難悉書蓋潛德勿耀幽宅不可無銘者已銘
曰

君之居在苔雲宇東暘諱開甲讀父書通六經曲臺禮

尤研精不矜名不嗜利孝于親友昆弟廣述作何紛綸
去者疵歸乎醇銘君藏列其目俾名山得著錄君四子
長曰麟叔也天仲季存君善人宜有後勒吾文表耆舊

徐州蕭縣儒學訓導樂君墓誌銘

維揚有嶽竒磊落之士樂君諱又令字允諧一字介氷
少能文學使者試童子拔置府學名第一其為人孝弟
廣交友輕貨財闢菹圃京江中焦山障其下芟荷葭茨
浦樹園之數重有橘獨立結實青黃足當洞庭百頭暇

則賦詩鼓琴陶然樂其志也既而海艚深入戰後廢為
牧馬之場乃移居江都郭東八十里築洗心亭雜樹花
柳比于故園風景略似乃講神仙服食之法成都費密
為作記君嘗一至京師以歲貢生入國子監選人按籍
除君徐州蕭縣儒學訓導而君堅不赴也居家遂潔白
之養父喪廬墓三年因徧覽青紫囊書兆基考宅家祭
立宗子主之通族墳墓咸為修治戚懿貧不能昏喪者
必資以私錢甑無水旱燥濕鄉鄰鬪者以片言釋其爭

蓋君之為善不倦如此君以明崇禎十年月日生康熙
四十五年月日卒享年七十配杜孺人子十人男四人
長經內閣中書舍人先君卒次緯江都縣學生次統候
選儒學教諭次大維揚州府學生女六人一適江都縣
學生蔣旼一適揚州府學生陳琴一適國子監生高鼎
蔚一適候選儒學訓導湯有斌一適江都杜德馨一適
歲貢生郭元銳孫男十一人長宮聲揚州府學生承重
服三年喪者也女九人曾孫男二人君晚自號悟賓道

人擇地于攝山戴家庫題曰悟賓歸宿處戊子正月既望井榑葬焉銘曰

舍儒官師老氏吁嗟樂君葬於此

文學鄭君壙誌銘

君諱珣字原道更字隨始姓鄭氏世居嘉興縣梅會里故無巨室數門才者曰西毛東鄭鄭氏有鄉貢進士知興國縣事諱士奇者君之世父也曾祖某祖某父某三世均不求仕君少治春秋既而嫉胡安國傳義之非

投牒更治詩家無田產授生徒自給所居破屋三間垣牆不蔽井闌竈觚紡輒畢聚一室客至呼主人闔門而與之語率以為常每文會賦詩君堅坐不作間擬樂府音節出入漢晉間一及諸經疑義講說紛綸闡前賢所未發以是問業者漸多束脩之入積累十金或勸君營什一之利君乃畀里人褚已浮舟于泖販吉貝花中塗為盜所刼已還語君異日必償君曰盜刼子吾責子償是吾亦盜也子勿復言鄰有曹甲貸君白金二鎰賣藥

于肆以甘旨養其親終歲子母不納或諷君收其藥肆
君曰甲藉是養其親匪利我財共子職也封其肆是奪
之食傷孝子之心吾弗為也由是人皆目君長者貴人
延君訓其子推大宅舍之居數月語人曰華門圭竇吾
素安之此非吾寢處地竟辭歸久之家益貧冬無衣脚
或不韞然終不以告人年七十有五以疾終娶崔氏先
卒子三人孫五人貧不克葬族人謀率私錢瘞君乃書
君言行納諸壙系之銘曰

子非墨氏之徒而葬之薄也猶勝保而委諸壑也嗚呼
斯命矣夫

曝書亭集卷七十七

欽定四庫全書

曝書亭集卷七十八

翰林院檢討朱彝尊撰

墓誌銘五

中憲大夫知思州府事陸公墓誌銘

去平湖縣治東六里五行湮有丘隆然為故中憲大夫
知思州府事陸公之墓公諱世楷字英一別字孝山曾
祖考長庚中萬歷八年進士累官南京通政司使進兵

部右侍郎祖考啟鑄國子監生以孫萊貴

贈通議大夫內閣學士兼禮部侍郎考濬睿宣府推官始封內弘文院中書舍人累

贈通議大夫內閣學士兼禮部侍郎妣譚氏山東布政司參政

贈太僕寺卿昌言之女累

贈淑人公少補學官弟子有文譽順治五年以選貢生赴吏部除平陽府通判又四年同知登州府又六年遷

知南雄府事後十九年丁父憂服除補思州知府蓋先
後視府事二十四年未得遷告歸四年卒卒時年六十
有五公之判平陽也甫至而姜瓖構亂遠近蠭起應之
平陽被圍守以下局縮不能畫一策公貸粟于富民籍
其丁壯登陴固守百日而圍解旋誘降其魁渠釋其黨
師後大饑人相食公為粥食餓夫馬周于郊市辨民色
先後給之餓者全活其在登州海寇揚帆猝至將逼城
下公立設守具率舟師禦之寇乃逸去時叛帥海時行

剽剝州縣僭稱王以公知兵事戒勿犯境又登有嫠婦
夜為盜所殺鄰里訐其媳有所私慮事露殺姑滅口公
攝縣事察其冤求殺人者不得禱于城隍神夜夢一馬
騰蹕不休晨徧呼死者戚懿嫠婦有姊子為驛卒公疑
焉訊之卒言殺人夜投牒入府公念投牒時日有文簿
可稽取驗之字屬改竄卒乃引服蓋卒初意行竊方入
門嫠婦突出猝加刃焉媳實不知也南雄嶺嶠門戶疆
理初定平南靖南兩藩王並駐廣州羽檄不絕于道部

將更替出嶺一日筭死七人公馳見帥論軍士罪有戴
孔雀翎者二人入始興山自稱平藩侍衛發民鑿礦民
盡恐公往詰曰王雖尊不得擅役吾民今不使太守知
詐也遂縛二人送廣州王不敢問黥僧與平藩暱結精
廬府郭外誘婦女入鎖其夫後圃而淫其妻閉置者十
餘公誦知之僧故拳勇手一梃百夫莫敢近乃詭言營
齋延之至入門門焉者振闔及堂階則胥隸畢集縛之
以前僧瞋目呼無罪公先時已別遣捕卒盡執僧廬所

藏婦女至庭下僧辭窮公斃之杖下邦人皆以為快嶺南俗好訟公曲喻以理赴愬者漸息暇築天峰書院課諸生溫鏐王雲等講學買田以饒之去之日老穉拒輪遮馬不得行立祠府治東士民春秋社祭其莅思州值王師凱旋軍馬繇繹府舊設平溪清浪二衛後劃歸湖廣而站夫猶循例派協公請于上官得免繼遭旱祲斗米二千錢吏請開徵秋稅公不可民德之輸者過半前守以增賦得遷公覆丈以弓無餘壤請反其舊又持議

謂思州雖列為府所屬止四土司居民附郭不滿百家
丁糧不及一小縣而又商旅不通營伍不設供億難與
他府齊宜仿黔西平遠近制降為州隸之鎮遠而以施
溪一土司割附銅仁可救一方之困議未允公乃以病
引歸矣公孝事父母友愛諸弟篤友誼能通財不以生
死為厚薄家無美田宅遇人有緩急必應未嘗責報歸
田後足跡不詣公府有司行鄉飲酒禮請公為賓辭者
三然後赴公于詩歸風合雅不墮叫囂之習文格醇正

手輯南雄思州二志事必徵信集若干卷存于家公生
某年月日卒于某年月日配張恭人生某年月日卒于
某年月日合葬于墓子男八人咸有文行一嗣仲父某
也女五人俱嫁士族孫男九人女二人銘曰

嗚呼古之循吏久于其官政以不煩民以不冤公于黔
于粵除惡必先濟之用寬客至張旌廬旅居船士也討
論席研壺餐志其山川申畫土田有德有言溢于炎塵
宜爾子孫克昌厥文美哉鮮原秀木丸丸固有後藉

許封君墓誌銘

晨有造吾門剝啄者童子以告眎其刺則給事中山陽
許君也延之入布衣管屢請以弟子禮見主人固辭稽
顙而後言曰志進不幸連遭父母之喪鮮民之生分不
如死茲日月有期將葬惟先生之文無諛辭庶取信後
世敢請銘按狀公諱某字信孚其先自吳徙于淮世居
山陽縣之東村曾祖歲貢生某祖鄉飲賓某考督師參
佐某公讀書通大義不就試居父喪自初終及葬一準

于禮母病視藥餌惟謹祭必致齋家法嚴肅不飲酒不
圍碁無嬉戲之具教諸子以義方少不當意輒施夏楚
性質直負氣不肯下人恒慷慨自許曰人生不行萬里
豪氣何由得伸乃南浮江漢北走燕齊西逾河洛歸治
菴園將老焉既而就給事君鐵嶺官舍因東涉遼海視
其子行取入京補戶部主事改授兵科給事中旋掌禮
科給事中印加五級公初授

封文林郎進

封朝議大夫配周氏慈惠有壺儀初

封孺人進

封恭人子男三長給事君志進也次某次某俱國子監生女三俱配士族孫男三女五尚幼公及恭人之還里也給事君方擬奉潔白之養而恭人以康熙四十四年五月先卒公旋以四十五年正月病終宜給事君之擗踊號泣深以不幸自傷也以予論之士惟貧賤得顧父母之養然無升斗之祿糠粃不飽雖欲啜菽飲水盡其歡

難矣若一登仕籍官守言責拘繫不得自由聞親喪逾時奔者有焉不得奔者有焉彼夫墨衰經以治兵奪情而秉國政豈其初心不作孝哉殆亦時勢迫之貪位之念既萌立身一敗遂不可以為人子今給事君以言去國眷戀庭闈朝餐夕膳病奉藥裹喪視歛含凡附于身周于棺槨者無不致其誠信勿之有悔焉而且吏不呼其門朝不釋其服孝子慎終之禮斯可勿憾毋亦不幸之幸也歟銘曰

淮之水漣漣得地而流有崇者丘是為太岳之裔給事
中之考妣合葬于是幸哉有子

知交城縣事靳君墓誌銘

君諱治青字東表先世自歷城徙遼陽曾祖某贈光祿
寺卿祖某贈通政司考弼通議大夫兵部職方司郎中
君其第三子也年十三喪父習舉子業服除試不售補
筆帖式以贍敏稱出知太原府交城縣事交故巖邑號
難治君至興教化勤撫綏開誠布惠民乃胥悅歲乙亥

平陽地震人死者萬計君奉調勘災掩骼賑饑殫竭心力會禁旅北征道出雲朔奉軍符協辦糧草鄰縣率多浮派君獨斟量緩急極意節省民無重困又踰沙漠送戰馬至大青山不敢告勞無何郡檄下文書督責過當君素寬和及是忿甚因得心疾不復出廳事然庶務能舉大綱無關冗者閱三年乃請歸歸六年遭母崔淑人喪疾益甚又踰年遂卒予昔遊太原嘗一至交城矣縹馬城隅登萬卦山日暮風雨作遂留宿僧舍夜聞擊柝

雜魚板聲山僧竟夕不寐晨起鋪眉苦眼有憂色詢之
山去縣西北五里逼寇穴窟其徒慮驚客也其後錢
塘趙君吉士宰是縣請於上官調兵勦平之然遺種尚
未盡及君為政幾于卧理而在交九年邑無桴鼓之警
民樂其業以是信君之才為不可及已君嘗依其兄養
疴官舍暇探四明三衢山水之勝間賦近體詩小詞清
疎秀逸頗入作者家數惜乎短折未克升堂入室也君
生于康熙己酉十月二十五日歿于乙酉十一月三日

妻孺人李氏故安徽巡撫都御史諱鈞之女柔順有婦道生康熙丁未六月二十六日歿于乙酉十月十三日子寶齡尚幼經紀君之喪而闕葬君夫婦于某原者君之仲兄寧波府同知荆也銘曰

一朝之忿疾不可醫胡才人之不達而命止于斯吾銘幽宅太息齋咨矧伊兄弟奚其不悲

儒學訓導倪君墓誌銘

同里倪君識之四十年君時授徒城東竹亭橋即其人

恂恂有君子之容觀其文悉本經義君早見知于有司
九試場屋不利年四十八以歲貢入國子監諸城李侍
讀澄中讀其

廷試卷亟薦之榜發以儒學訓導待銓是秋赴順天鄉
試復不遇君乃焚所作詩文就予宣南坊邸舍講經義
學為古文辭其說經不專主宋儒謂易有君子之道四
不當專主為卜筮之書又謂尚書古文可疑武成紀日
與召誥顧命異益可疑又謂孔子說詩蔽以一言曰思

無邪淫奔者豈暇作詩而孔子取之當依小序為是又謂大小戴同授禮不當偏廢大戴氏宜去月令存夏小正去明堂位存明堂投壺則參用之又謂說春秋者紛綸皆害于義孫復胡安國刻深尤甚又謂羣經縱有錯簡宜仍其舊宋元諸儒多逞臆見更易未免侮聖人之言其持論頗與予合因留不去取韓嬰鄭康成以下詩說五十家折衷而抄撮之既而予移家具寓宣北坊轉徙斜街花市君授經宣武門內弟子著錄者甚衆乃避

跡西山君精于易卜斷卦奇中又善青黃紫囊之術撥沙發水偶為主人相度聞者造請日繁君曰吾術期避禍爾諸公欲以化者要福不可得也先是有例選人入貲者得先除君念親老思謀三簋以養束脩之入悉輸之官名當注除目矣或素其籍歷數歲名反居後遂引歸歸事其父飯糲焚枯怡然樂也逾年痛其弟天無子遂成痼疾歲在丙子筮之得乾之同人曰此六月之卦也吾其以是月終乎壬辰眊果卒年六十有一君諱我

端字郢客初名野王字古期先世嘉靖中自紹興避倭亂徙嘉興曾祖文遇國子監生仕為廬州府經歷祖某早卒祖母闕持苦節授君毛詩孝經者也父某不仕母張氏妻吳氏子二人仁存國子監生鳳喈海鹽儒學生女一人壻國子監生沈某孫一人女孫一人君事祖母父母孝友于諸弟無間言又急人之難故人有孤不負其託平居義命自安客或憫其不遇秋試以關節進拒不受又臨財廉口不言利婦翁念其貧贈以負郭田六

十畝君固辭翁沒亟還外家券人有所負不責償其人
內愧久而獨完其逋或以計中君君亦未嘗宿怨其學
以正心術為本博通經史尤邃于詩稿雖未就言詩者
莫能過焉間與浮屠道士還往然臨終誠其子不得作
佛事其守正若是嗚呼今之為校官者許以貲進黃口
白面後生目未覩九經之文擁臯比自詡師表者不可
悉數以君之學俾登講席庶幾合乎古之書院山長足
為士子圭臬而卒不得試所長老于逢掖死不亦可惜

也夫于其墓宜有銘銘曰

譬彼積薪先者後之孰是人斯不試其才天乎祝予予
寧不悲

文林郎知舒城縣事朱君墓誌銘

里有同進士出身知廬州舒城縣事朱君諱振字嗣宣
一字千仞所居州東灣在清香樓左蓋府治即秀州治
故名君孝父母友愛諸弟睦族人以兄事予其論學以
主敬為本文尚體要去枝葉歲乙卯受知崑山徐公秉

義舉鄉試第三人己未試禮部釋褐于太學丁卯籤除
今官戊辰冬十月

覃恩授文林郎壬申六月卒于官舒城自崇禎壬午遭
寇亂井邑丘墟入

皇朝雖加意安集然居民多鴈戶遇歲凶輟耕而走催
科不前又路處劇驂送迎官長鮮暇日俗好鬪士多廢
學君至首葺明倫堂月課士子以經書義均賦稅清保
甲勸農桑息爭訟凡害于民者次第去之莅官之明年

武昌兵變

王師有征由舒入楚民大恐市肆皆閉君令大開縣門
悉民間市肆所有物徙置兩廡君立檄下俾胥史與隸
操斤權具升斗束芻茭洗盆甕君平物價而鬻之兵兵
獲醉飽歌舞而去先是上官欲調江寧兵戍英霍府檄
下俾封桃溪運米船以載典史請任其役君曰無庸舒
非必由之道也既而府檄復下令釋所封船人乃服君
善料事縣多槁壤水利久廢不治舊有七門三堰十塘

漢顏羹侯信始造至魏揚州刺史劉馥修復之溉田二萬畝迄于明知縣事范得民劉顯更事修築民共其利後為勢家曲防遏之使不下君循覽故蹟毅然以疏濬為己任諏日鳩工畚鍤聿興克復其舊舒民布穀既穫赤白相雜計部以所輸米色不純行令赤白分貯山農苦于分揀君力請漕督援河南事例免分貯其言曰身為親民之吏而民隱不知罪已不勝誅矣若知而隱忍是視一己之功名為重而萬民之怨罵為輕義之所不

敢出也漕督嘉其強項允咨計部焉君治舒五年盡心民事不遑暇日以勞邁疾終于官舍囊無長物舒人祀之名宦祠且率私錢設祭道左執紼泣下者千人既歸喪以康熙四十二年十月葬於嘉興縣北辰字圩祖塋之左於是鄉之父老子弟謂君循吏宜配食鄉賢之列衆皆曰可有司得請乃造粟主送黉宮君之曾祖某祖某俱不仕父某勅封文林郎舉鄉飲大賓年九十而卒母張氏贈孺人繼母爰氏封孺人妻凌氏亦封孺人子

三德溥嘉興縣學生修永益求俱國子監生女二一嫁
王上舍藩一嫁吳上舍瓚孫男二人尚本向東女二人
曩者君謁選人于京師就予舍館相與論古今得失聞
予一善言喜動于色有過未嘗不相規也蓋知君之詳
者莫予若德溥兄弟請誌君墓遂不復辭銘曰

悅以使民民功曰庸胡不報最而遽凶終邑有俎豆里
配瞽宗君可勿憾反塋家江

文學胥君墓誌銘

咎氏之望出太原又出彭城其自陝西三原遷于宣州則宋靖康間諱某始也自宣城遷懷寧則明洪武初諱某始也君諱某曾祖曰某有隱德祖某嘉靖癸酉舉人知金谿縣事考某縣學生員君年十八補學官弟子以文試有司輒置高等名籍甚于時貴池吳應箕次尾宣城咎質無疑交譽君延之入復社復社者東南知名士相結持清議拒閹人黨與東林卿大夫聲氣相附和者也應箕實為倫魁君辭不可謂必有鈞黨之禍未幾果

然其時馬士英阮大鍼柄用濫以名器假人江東諺曰
職方賤如狗都督滿街走而大鍼之母君之姑也一日
君往省焉大鍼留之邨謂曰弟欲官乎君不應曰道匪
遠也池州太平需同知府事督餉數月可遷爾君以不
習吏事辭遂亟引去大鍼既死平生藉其勢者或竄匿
或縲絃繫之或遇于道至唾其面而君獨以遠權力一
無與焉人曰咎君可謂皎皎素絲涅而不緇者已君性
孝友六齡繼母王撻之無完膚幾絕婢奔告其父父大

憾君曰母撻兒教兒也家人聞之盡流涕及父卒執喪
盡禮讓產及其弟鄰里匱乏有昏喪必助之君始居懷
寧縣北荻坂廬舍為寇所焚乃徙桐城棕川之梅渚晚
結茅杏花村筮之得坤之萃曰括囊无咎无譽因自號
晚訥書其壁曰飽吾嬉焉爾卧吾寧焉爾醉吾陶陶焉
爾又曰惟慎無憂惟忍無辱惟靜長安惟儉長足君子
學博綜經史旁及醫藥卜算之書老而愛釋典恒語其
子曰吾前身恍忽在深山草閣中積雪千丈有龐眉叟

行送別執手不能舍來自雪中吾生矣吾沒之日亦必
以雪夜及卧疾天大雪擁被起曰吾其逝乎遂卒君妻
阮氏曾祖鶚巡撫浙江都察院右都御史祖以臨欽州
知州考士鑲銓授府推官歲乙酉叛卒屠城阮氏遇賊
以刃脅之不從身被重創猶罵賊幸不死享年七十乃
卒子男二人茹芝茹穎女二人孫男三人女六人曾孫
女一人銘曰

適來雪也適去亦雪也夫子之潔也琢銘幽宮永勿涅

也

文學曹君墓誌銘

君姓曹氏諱山秀字中峽嘉興人祖父皆不仕君幼習詩補縣學生員歲乙酉嘉興城破予年十七依外父馮君避地練浦塘東君世居幽浜予兄事之有吳君茝者人目為狂生家橫涇水曲相去各二里而近中道為五兒子橋三人者暇輒相訪糲飯一盂肉一桮酒一注留必醉飽日將暮悵悵不忍別及橋徘徊橋上縱論天下

事有不合吳君瞋目視大譁唾及人面橋畔叢祠有病
僧聞之駭蹢躅出窺戶牖則見笑啞啞不止疑始釋也
既而予同君讀書烏木橋村賦詩日酬和君有詩曰魯
連思蹈海申徒欲沈河猗嗟古之人不為世俗阿俄而
盜刦主人居君有弟從學善泗水盜至亟投河君亦亟
投河沈浮于水者數其弟竟死而君不善泗水反得不
死鄉人以為詩識君痛弟故自是不復作詩專治舉子
業弟子從之游者漸衆館真如僧舍僧寂月通儒書能

詩子每偕吳君造君則寂月亦至劇談移日不去夜坐
彌勒龕琉璃燈下恒達旦不寐寂月語人曰與諸君譚
假令載筆紀之即法言中說也聞者怪之不顧予既客
游四方久之吳君亦入楚轉客于黔以卒未幾寂月亦
逝君十赴省試不利乃附載運船訪予京師會予奉命
主江南鄉試君至則大困旅食淨度寺著散懷錄自遣
比予還則君已病遂不起予往視其斂兄子某扶其柩
還半塗亦沒淹數月始達于里子某葬之先世之原君


娶某氏繼娶卜氏卒時年六十嗚呼方予與君田居住
還晨夕者寥寥數子相見肝膽畢露妄謂天下無不可
交之人無不可言之言其後朋遊日廣夷懌怨隙皆非
吾意所期始信久要之難悔少日之失而轉惜舊友之
亡為可痛也銘曰

生吾以為兄死吾與為銘人不如故先民豈欺我哉

張君墓銘

南徐之州斗分野大江浮浮繞城下吁嗟張君老環堵

易緯蒼牙詩媿雅曉吟午誦夜膏火稽之于古闢學舍
包咸韋昭庶其亞身雖不遇行則果貽厥子孫三獨坐
施于有政無不可譬諸江流千里寫發源自岷者君也
有崇斯丘神所妥斧屋既封樹枌櫨納銘于幽告來者



曝書亭集卷七十八

欽定四庫全書

集部

曝書亭集卷

七十九
八十

詳校官庶吉士臣汪彥博

助教臣常循覆勘

總校官降調編修臣倉聖脉

校對官修撰臣吳錫齡

謄錄監生臣費思書

欽定四庫全書

曝書亭集卷七十九

翰林院檢討朱彝尊撰

墓誌銘六

烈婦楊氏墓誌銘

華亭之鄉伍胥浦之右有水曰璜溪陳氏世居其上烈婦楊氏者儒學生諱某之子給事中諱某之孫嫁陳某生三子一女松江城破游卒乘勝至璜溪執陳某斧傷

其首烈婦奔救其夫卒舍某執婦某得脫婦給卒曰毋縛我我走及汝卒信之比登舟遽躍入溪中死時年三十有一陳氏之僕有妻曰張惜匿葭葦中見婦死狀兵退其長子曰治年十二號于溪畔越二日婦尸浮溪面得就斂當是時游卒大掠溪上一婦投溪之東曰徽州商人孫氏之媼一婦投溪之西曰儒學生孫諤妻顧氏三人皆完節死烈婦幼能讀毛詩孝經列女傳平居訓子女不輟舍傍有梅三十本皆其手植葢至今存也治

好學多材藝游于京師以醫自給將歸葬其母乞其友
秀水朱彝尊為銘銘曰

溪之水沄沄若斧者墳於戲女子而烈如是既活其夫
乃捐其軀有子也賢壺行斯傳我銘于石南史是擇

蔣孺人墓誌銘

康熙二十有三年彝尊謫官居京師之宣南坊武進龔
勝玉持束紡升堂再拜請銘其祖妣蔣孺人之墓彝尊
老矣而文不加進恒自慙許之而未果作也後三年勝

玉復謁予宣北坊固以請乃取其季父燾所為行狀誌之曰

孺人姓蔣氏先世侯爵也自宜興徙府城曰某曾祖考也曰某江西吉安府通判祖考也曰某國子監生考也年二十三歸龔某事孀姑以孝姑沒哭盡哀上膳繆幕無異事生者其持家以儉蒿簪布裘躬自操作相夫子三十年生產日益既遭亂率其子士樞匿深村葭葦中士樞中濕疾殞叔子士黥亦殤越三年而寡孺人少知

書能讀孝經列女傳教其子若孫讀書歲時腰臘修祀
事惟謹門以內肅然睦于娣姒族人喪葬務以錢資之
有貸者靡勿與與不責其必償也孺人年七十季子士
燕以治歷官欽天監歷科博士假歸於是五子及婦十
孫咸奉觴為壽鄰里以為榮既而士燕又死歲在己未
孺人亦以疾卒享年七十有七子男八人女一人孫男
若干人女若干人曾孫男若干人女若干人勝玉好學
有文以國子監生知名一時昔河東柳宗元于其母盧

叔妣陸伯祖妣李皆不外求而為之誌勝玉宜古是師
顧數請于予予則烏能詳孺人之壺行也系之以銘銘
曰

杞也似宋也子楚也芊蔣諸姬文王裔封通侯陽羨里
後徙郡世膺仕孺人賢為龔婦孝厥姑配嘉耦訓子孫
勤莫比善必昌自今始蓼莪山樹粉梓井同穴葬于是
勒吾銘庶垂久

朱孺人墓誌銘

先太傅文恪公有女二人其一作配臨安縣儒學教諭
平湖陸君淪原彝尊之王姑也生子埜以能詩聞于時
女嫁劉炳圖文恪公子女中孺人最少年十四嬪于陸
氏族黨交稱其賢敬以事姑謙以接娣如儉以自處家
人外內忘其為宰輔臣女也孺人生于萬曆三十八年
正月日歿于崇禎十六年十一月日年三十四卒之日
一女甫嫁子猶未婚也陸君悼孺人不已遂不復娶獨
居四十年及卒有孫四人曾孫男女七人於是埜昇孺

人之樞祔葬于東湖之鱗圩屬彝尊為銘彝尊生時先太傅已卒是時曾祖王母何太夫人尚存孺人歲歸寧者再伯叔舅弟姊妹羅拜于堂猶記孺人貌言必莊行坐皆有矩度今老矣回首少日事若夢寐先人北門之宅曩之聚族居者已不可問及孺人之葬北門羣從少長零落殆半銘其墓不禁涕泗之下也銘曰

朱氏之先居商河之許贈少保者孺人曾祖祖同厥官太傅為父實相熹宗事在策府陸亦清門莊簡後昆夫

也通儒子才逸羣齒雖不永後嗣則繁東湖之漬松柏
在原兆基井椁孔固且安孰銘幽宅乃其歸孫

嚴孺人墓誌銘

常熟隱湖之濱隱君子毛翁居焉其繼室曰嚴孺人孺
人者明光祿大夫太子太保吏部尚書武英殿大學士
贈少保謚文靖諱訥之曾孫隆慶丁卯鄉貢進士承廕
中書科中書舍人諱治之孫國子監生諱枏之女年二
十有三嬪于毛氏孺人生長高門既嫁卻綺紈金翠之

飾簪蒿裙布甘與翁偕隱翁先有母戈甫昏疾篤孺人居姑喪所以致其孝者無不盡也翁先有一子三女孺人撫之若己出所以用其慈者無不周也翁于家祭折衷司馬氏書儀朱子家禮行之孺人潔治錡釜所以將其敬者無不專也翁勤學嗜古博覽典籍謂經術必本漢唐庶窮源得以津逮乃于崇禎元年開梨棗之局發雕經十三史十七于所居汲古閣下時諸務未中條理明年孺人來主中饋分命僮僕各執其役讐勘之賓削

刷之工裝潢熟紙之匠各從其宜秩然有序則孺人內
助之力居多自元典章用宋熙寧經義取士所主傳注
率本淳熙諸儒明因之經生立異義者黜又以灑埽應
對進退易古小學其後書數方名均置不講而識文字
者寡矣挾三家村夫子兔園冊足以取高第縻好爵而
有餘無事洽聞周見也翁深憂之力搜祕冊經史而外
百家九流下至傳奇小說廣為鏤板由是毛氏鈔本走
天下翁既沒孺人持門戶又二十一年其子扆精小學

傳寫諸家金石書畫記及古五曹九章算經思盡刊刻以行可謂善述先人之事者已翁初名鳳苞字子晉後更名晉別字潛在天啓崇禎間屢試于鄉不利後遂高蹈不出有子五孺人出者四曰褒曰袞曰表存者扆也孫二十人曾孫二十三人翁之葬也于某里某原今以孺人祔扆率其諸兄之子來請銘銘曰

裴宗五眷李族三祖志尚詩書相門之女河間汲郡抱經以傳隱君嘉耦其功媿焉同穴既封考宅永久我作

斯銘有徵于後

王淑人墓誌銘

淑人諱克榮姓王氏順天宛平人今保和殿大學士太子太傅兼禮部尚書加三級熙之女光祿大夫太子太保禮部尚書諡文貞諱崇簡之孫布政司使

贈太子太保禮部尚書諱愛之曾孫太子少保吏部左侍郎山陰胡公諱兆龍之子婦河南提刑按察司使介祉之配也

世祖章皇帝時王公胡公並以翰苑受知備顧問侍左右兩公交好日篤同居禁近無間言既而胡公沒遺產甚薄公配劉夫人鞠育三歲孤比長延經師教之學脩脯必豐又睦于懿親日費恒貲持門戶甚力王公每歎其賢曰吾當以女為之婦於是淑人年十五歸于按察君事姑惟謹不以生長富貴自矜也君既通籍為工部營繕司員外郎遷兵部車駕司郎中以清白自勵俸入苦不支淑人拆花鈿易米鬻嫁具于市不少靳及出為

湖廣按察司僉事督理驛鹽事務會

王師平雲南凱旋檣櫓轅馬絡繹于楚君治公務不遑
啓居淑人事其姑彌謹明年君移官山東布政司參議
督漕運駐德州未行而淑人卒卒後遇

覃恩誥贈恭人進贈淑人生于順治十七年十月甲寅
沒于康熙二十二年七月辛巳年僅二十有三淑人產
五女其三天謂按察君曰姑老矣宜亟見孫為置妾媵
二人視之若姊妹然及淑人沒舉子三人女四人嗚呼

婦德之難也貴則陵長才則嫉下蓋往往然矣淑人孝事其姑順事夫子而仁以逮下可不謂賢乎且匪獨淑人之賢亦以見王公門內之訓之嚴交友之厚而按察君伉儷之重自淑人沒後十年不更娶皆人之所難能也已銘曰

以淑人之德曾不永年迴鸞有紙賁于下泉伐石于燕奪玉之白刻我銘詩可永無泐

孫恭人墓誌銘

戶部廣西清吏司員外郎休寧程君岳造予旅館奉幣稽首而曰曩者屯溪石橋之建先生記之以文道先君子為德于鄉里甚備今不幸先恭人喪將合葬于某原卜兆有日冀先生一言掩諸幽敢以請予不敢辭廼按狀誌之曰

恭人姓孫氏世居縣之西山父處士某有五女不生男子恭人最少嫻內則處士憐之及笄歸程翁子謙翁遠服賈貿遷滁泗潁亳諸州恭人家居事舅姑盡力潔盤

餐而能飭躬以儉暇課賦僕種紫瓜白莧蔬果繞牆屋
夜督女婢篝火治機絞以為常惟教二子厚脩脯延名
師講經義每放假叩以所學則色喜謀于夫子置祭田
春秋聯其宗族又念所生之不祀也別為祠屋立粟主
俾二子陳俎豆拜焉賙戚懿之窮者賻鄰里鄉黨之死
喪者至率水之隄屯溪之石梁動費金錢累萬恭人悉
勸翁成之蓋翁固樂善不倦亦由恭人傾箱篋不少靳
蓋所見者遠而所施者弘矣今世祿之家夫不以智率

婦不以義從往往為之婦者輒制其夫夫亦甘受制而不知恥即為善之念油然而根于心而管鑰恒司于內雖銖兩之需不謀諸婦不可得由是失其初心者不少也惟浮屠道士營造動以禍福惑愚婦人則施予者有焉以予聞恭人臨沒誠其子勿作佛事嗚呼恭人孜孜為善若是特不惑于二氏此士君子所難能也已恭人生于明崇禎元年月日卒以康熙四十二年月日享年七十有六以

覃恩誥封子二人長即員外君次崙內閣中書舍人出
嗣世父後女三人均嫁士族孫男五人女一人曾孫男
一人銘曰

德積于身寧責報于子孫然不爽者天徵信者文吾銘
其藏宜惟以貽程氏之後昆

馮媼冢銘

嘉興縣治東南三十里曰練浦浦之東民居曰馮村村
之女有終身不嫁年六十七以死者曰馮媼媼之兄歸

安縣儒學教諭馮君也。葬媼于君之宅西二十步而誌之。以文者君之壻朱彛尊方媼年少。父母欲嫁之。媼之言曰。吾好直言而貌樸。好直言必獲罪。翁姑貌樸則不禮于壻。嫁焉。未有不困者也。吾從兄嫂以居而送父母老。何以嫁為。馮君憫其言。不復強也。媼之父母既沒。食于其兄者四十年。君既就官。乃依予妻以居。抱予子女。甚謹。予游嶺南歲丁酉正月媼以疾卒。予妻視其殮殯焉。予哀媼無祀。爰封以土。銘其藏在某年月日。嗟夫婦。

人之義從一而終嫁而寡守貞宜也其或未嫁而夫死雖未從之以身守其言不改其節蓋世之所難能故或旌其門或表其閭則猶有名焉若媼之貞無得而名焉者也予嘗疑媼迷惑佛氏之言詢之馮君暨予妻則媼生平未嘗事佛異哉媼之所以自處也銘曰
猗女子之不字無非無儀瘞汝銘汝夫又奚嗟

葉媼冢銘

葉媼者乳予于襁褓者也予生四齡媼歸歸九年浙東

西大旱飛蝗蔽天歲饑人相食而嫗之夫適死因就食
予家予家自先太傅文恪公以宰輔歸里家無儲粟先
大父繼之益以廉節自礪知楚雄府事還力不能具舟
楫至是先大父已卒先處士安度先生家計愈窘嘗至
絕食從祖諱大定通判成都以蜀江米四斛貽處士米
色殷而糲食之咽喉若中魚骨嫗不得飽乃流涕辭去
十年之中凡五嫁而夫輒貧嘗語人曰安得十郎驟富
使我老不復更嫁乎其言可憫如是十郎謂予也嫗年

七十有一而死死之日後夫益貧予妻為典衣買棺以殮越明年戊申予在濟南聞而哀之資其夫錢若干俾往瘞焉寄之以銘曰

婦人五嫁理則不可貧實驅之否誰依者傷哉貧乎乃至辱其身乎

曝書亭集卷七十九

欽定四庫全書

曝書亭集卷八十

翰林院檢討朱彝尊撰

行狀

徵士李君行狀

曾祖考應徵國子監博士祖考士標寧海州同知贈尚
寶司丞考寅國子監生君諱良年字武曾初名法遠又
名兆潢年三十乃更焉先世江陰人明洪武初提舉行

千四者徙居嘉興長水上梅會里七傳至博士中萬厯
元年舉人有詩名著澄遠堂彙稿司丞繼之有蒼雪齋
集當同知寧海州事值冷口兵入圍城固守三月以勞
卒而城陷巡撫右僉都御史曾化龍上其事得贈官君
之考上舍以結客破家饘粥恒不給然必延師教諸子
妣顧孺人佐之脯脩獨豐故君之兄弟咸奮志于學君
九齡能草時文十齡解賦詩既而上舍客死韶州家產
益落鬻其故居兄弟並棲小屋君又喪偶就族人為童

子師予方避地長水偕里人詩篇酬和處士屠橫謂予
曰子之才里中罕儔吾門有李生將來庶幾與子並駕
乎予遂與君定交晝輒劇談夜或襆被共寢四方賓客
至則醵錢留飲相與論詩文流別議有不合難荅紛綸
聽四座折衷而後已君既再娶始有居一廛集同里詩
人聯句樓上君兄繩遠弟符與焉江鄉言詩者目為三
李時商丘侯方域南昌王猷定皆以所撰詩文鏤板于
浙君覽之終卷曰是不難遂期予共作古文沿流溯源

論次之於詩持格律甚嚴嘗抄撮詩中禁字一卷授學
詩者繼乃舍初盛取中晚唐及宋元諸集別出機杼鏘
洋淡沱極唱歎之致於詞不喜北宋愛姜堯章吳君特
諸家故所作特穎異予游京師轉客太原後二年君亦
至都下無所遇留宣府予從逆旅見之期之復入都偕
游西山題詩于壁傳抄者不絕一時朝士爭欲識吾兩
人每名客客輒詢座中有朱李否合肥龔端毅公鼎孳
為文酒之會延知名士三十餘人君以墮馬後至燭見

跋矣必俟君至乃舉爵宛平孫侍郎承澤謝客著書特
與君為忘年交長洲汪編修琬為文高自矜詡獨傾心
下君沛縣閭舉人爾梅論詩斷斷惟與君相洽君方欲
羅當代之文甄綜為一集曰文緯人咸冀君之錄其文
也故縞紵之投恒倍又持論和婉多可少怪善言作者
之心思故人皆樂就君論說永年申檢討涵盼常語人
曰聞朱十論詩文使人心懣未若李十九之可親也於
時曹侍郎申吉出撫貴州引君為助既聞三藩同撤君

曰亂將作矣遂力辭歸為母壽既抵家雲貴告變歲戊午

天子思得博學文儒備顧問著作之選君被薦入京師
己未三月朔

召試體仁閣下

賜大官饌高坐而譙申以

詔旨謂文武科進士殿試未有此典也君譙畢纚纚千
言賦詩皆極瑰麗閣臣以八十卷進

呈顧君不與焉君既不得意有鳳陽守延君君與偕守
重君自畫諾外悉以委君君留久之歸築秋錦山房于
漾葭灣其南曰觀槿東曰剩舫北曰息游草堂坐卧其
中弟子著錄者日衆君精心計其築草堂也櫛櫨柱枅
瓴甍之屬一經鳩度立匠人巧者于前分授之斧斤既
施不爽尺寸至于相原田治耕稼藝蔬果雖農圃恒歎
以為不及也其後兩至福州贊巡撫軍事尋以崑山徐
尚書乾學開書局于洞庭山君應其招助修一統志自

是歸不復出予既罷官與君往還投壺飲酒無異少壯時今年五月君病疔既痊矣復病竟沈綿不起享年六十初娶錢氏兵科給事中桐鄉諱允鯨之孫生員汝邁之女繼娶陸氏子一人潮偕國子監生孫男三人菊房莫房蓉房君所著有秋錦山房集若干卷嗚呼自君以薦入不登朝簿同時無不惋惜雖然君得優游幕府偃息于田里菽水足以養親大小之山上下之洄足以樂兄弟詩書足以教子孫耕桑足以課僮僕則天之所以

予君者不為不厚彼一命之榮要不足為君重也竊意君雖未仕他時國史傳文苑宜及焉乃因潮偕之請書其平生大槩以為狀俾後之君子有所考

國子監生錢君行狀

國子生錢君既卒其子炘哀經稽顙請予作狀予與君居同里君之舅譚給事瑄陸閣學萊子中表兄弟也炘又從予游講經學習聞君門世及君行己本末義無可辭狀曰君諱樞初字又鶴世居海鹽半邏村本姓何氏

始祖某于洪武中坐事戍黔屬其次子某于錢翁遂更
錢氏五世祖薇中嘉靖壬辰進士官禮科給事中以星
變陳言請斥方士忤旨免歸講甘泉湛氏之學卒贈太
常卿高祖與映嘉靖甲子順天舉人曾祖周內閣辦事
中書祖嘉徵以諸生入貢留京師值莊烈愍皇帝初踐
位是時魏忠賢方怙勢人莫敢言嘉徵首上疏劾忠賢
滔天十罪直聲動一時久之除知松溪縣事還卒于僧
舍考泮崇禎丙子舉人妣譚氏山東布政司參政贈太

僕寺卿昌言之孫官生貞和之子君生十齡而孤居喪
如成人克盡禮服除兵起城遭屠乃奉母村居而君之
祖留松溪唐藩據閩擢監察御史時七閩未入版圖謀
報有司奉臺檄捕家口繫君獄中祖還始得釋旋補學
官弟子授弟楨以書或勸君入國子監試京闈君乃一
至都念母譚孺人不已即引歸鹽鼓菽水盡潔白之養
有餘周其族黨買田以供舅家墓祭俄弟楨沒以所愛
子燔為後及弟婦遺腹生男君殫心撫育之居母喪尤

盡孝茸治先世丙舍手植松楸嘗稻麥果竄必薦新于祠屋至于私錢出入無錙釐妄費審緩急後先以分薄厚不畱不濫人咸服君治家之有法而予嘗遇君于舅氏所劇譚古今事君世受尚書能辨析今文古文中文之別而兼通周官禮經國理才之方吾鄉自明宣德四年析嘉興縣地立秀水嘉善二縣其時祇依戶籍為憑不以疆界分畫故三縣之田互嵌民相安者二百餘年迨萬歷十三年嘉善之民忽以糧額不均起訟於是三

縣爭訐紛綸不已蓋至今猶然江浙賦夙重吳俗相傳
明太祖惡張士誠拒守故重斂其民畝稅有輸官七斗
餘者君為論辨其非是謂禍始于賈似道經界推排之
役當日原有官田民田官田輸租民田輸稅其後知府
事趙瀛取而均攤之嘉興官田不及二千頃而民田五
千八百餘頃故其賦最輕嘉善民田止三千一百餘頃
而官田二千七百餘頃故其賦于三縣中差重輕重由
官民田數不均非因嵌田之故著論萬言推衍事始更

端詰難其言旨悉與予合予益信君學術之有本也君娶陸氏繼娶吳氏子男六人女一人孫男七人女十人嗚呼今之治舉子業者局守宋儒之訓注百翻兔園之冊足以取科第而有餘問以鄉曲之利弊茫然如坐雲霧其與斯世何裨焉君能繼其家學彊直自遂又以餘力考稽財賦鹽筴之源挈然有會于心發為論辨無異建始文學御史之議惜乎不用於時終老牖下人亦罕有知者此予因哢之請傷君之亡不可以不述也謹狀

亡妻馮孺人行述

孺人姓馮氏諱福貞字海媛世居嘉興練浦之陽考諱鎮鼎歸安縣儒學教諭妣胡孺人生母沈氏教諭君為學官弟子有名交漸廣乃徙居府治之北再徙碧漪坊去先太傅文恪公第近止百步教諭君年過四十無子生孺人特珍愛之五齡延塾師陳翁授毛詩孝經有費姥者往來教諭君家見孺人聰慧為先妣唐孺人述之唐孺人屬姥為妣是夕教諭君夢文恪公衣袞造其門

遂以孺人許彞尊為配寒家自文恪公以宰輔歸里墓
田外無半畝之產祖考忱予公知楚雄府事還僅敝衣
一簾而已至本生考安度先生家計愈窘歲饑恒乏食
行媒既通力不能納幣彞尊年十七為贅壻于馮氏之
宅遭亂兩家各去其居唐孺人病終丙舍安度先生攜
兩弟播遷塘橋之北生祖妣蔡孺人又歿先生益窮苦
彞尊既昏孺人贊予往侍養教諭君以田二十畝持券
付孺人孺人語予曰割父之田以奉翁非力養矣辭不

受挈其女至塘橋鬻所有金條脫治饔膳為兩弟補紉
衣履隘不能容遂賃梅里道南茅亭之居迎先生至里
繼又移居接連之橋予授徒不給遂南渡嶺越二載歸
則孺人徙西河村舍是冬復還梅里所居屋人傳多鬼
物目為凶宅孺人不少懾每晦夜滿屋梁皆白光墻下
雞喁喁有聲女巫來言發之當得金孺人謝曰吾夫家
累世顯官可以不貧今貧若此天也非所得而得之天
其殃之矣蓋居是宅十一年未嘗萌一念及室中之藏

馬教諭君卒于歸安官舍孺人聞訃攜子昆田及老嫗
二人見星而奔是時新塍以西盜充斥舟子咸股栗孺
人拊心號哭至哀羣盜舟泊岸相顧不忍肆刦予年二
十即以詩古文辭見知于江左之耆儒遺老時方結文
社興詛誓樹同異予縶謝不與而四方知名士往來于
禾者輒造梅里孺人治酒肴必豐雖夜分區畫立辦賓
客過者談讌極歡或淹留旬日方去花鈿無多盡付質
庫晝夜紡績以贖客至復質如是以為常交謫之言初

不聞於梱內也歲癸卯予客永嘉其冬安度先生病革
家無斗儲孺人邀予姊妹同視湯藥予歸未旬日而安
度先生棄世孺人哀毀治喪事靡不中禮既而予游大
同轉客太原入于京師復留濟南孺人力持門戶歲時
媿臘修祀事惟謹延經師于家誨昆田必具酒肉操作
愈勤夜率二女治機絞不輟坐昆田于紡車之旁執卷
于燈背令就火光課晝所讀書必成誦乃已給紙筆使
臨摹法帖凡昆田交游至或有燕朋雜于坐孺人必嚴

誠勿與交越五年予歸里為昆田婚買宅于鄰宅西有竹曰竹垞謀葬安度先生唐孺人于長水之東將井椁矣葬師僉言不利主婦謂改歲乃可孺人語予曰姑之柩留丙舍二十餘年翁亦六年矣此而不葬葬何時乎禍吾當之勿悔也乃克葬孺尊以序當後晦在公孺人事公無以異于事安度先生也歲在乙卯公歿于項氏寡姊之室孺人往治喪成禮宗黨稱其賢孺人既嫁二女教其孫及外孫一如教子法己未予以薦

召試體仁閣下授翰林院檢討纂修明史辛酉充

日講官知

起居注是年主江南鄉試雲南平

覃恩封孺人貤贈唐孺人壬戌挈孺人入都癸亥予入
直

南書房

賜居黃瓦門之東甲子元日曩尊方侍宴

天子念講官家人居室

特賜肴果二席孺人九拜受之洵異數也是月予被劾
謫官三月移寓宣武門外孺人尋病病愈以秋八月浮
舟潞河還語予曰

君恩重夫子且留毋悻悻去自是予留京師既補官孺
人聞之乃復由江淮北上抵泊頭運河冰合孺人中寒
而病扶入車既至病漸痊壬申正月予復罷官三月解
維張灣津路滌紆以五月次東昌則分水牕已閉舟車
酷暑孺人病又作比旋里為長孫完娶時生母沈先已

病歿家人祕不言孺人訶知之大慟病復發饘粥不進
其後時止時作猶強起櫛沐理家務迨冬十一月馮村
族人以教諭君墓木且伐來告孺人心悸意謂未然既
而果遭伐孺人悲憤病愈劇蓋自是卧不能起醫藥不
能療及臨歿時語不及家事惟執昆田手曰汝幼時汝
父遠客我教汝讀書冀汝上進今汝七試而名不成我
又不能待命也夫語訖昆田方哀號而孺人逝矣孺人
生于明崇禎四年九月二十一日未時卒于康熙三十

三年二月十四日卯時享年六十有四子一人昆田禮部注籍監生娶沈氏女二人一嫁吳江周能察一嫁桐鄉儒學生員錢琰又從弟彞性沒二女無所歸孺人撫為己女一攜至京師嫁國子監生秀水徐雍一嫁吳江貢生吳南齡孫二人桂孫稻孫孺人歸予將五十年少日遭亂恒與予夜避叢篁密篠中流離顛躋凡徙宅者十一始克寧居為兩叔一子四女一孫昏嫁治兩翁及母胡喪備諸辛苦又津塗往來莫或遑處蓋終身憂患

未嘗一日自安平居慈愛肯周人之急所至鄰里戚懿
無不歡洽雖漁娃竈妾食必推與之以是孺人之歿聞
者無不歎息嗚呼悲夫謹撫其遺行以告立言之君子

誄

故都察院右副都御史總督浙閩軍務朱公誄
嗚呼邾婁之後望沛及吳其在于齊東郡是居枝分葉
布本一根株公之哲舅謹言無隱撫浙制畿中法而殞
紀于太常易名惟允公也繼起早歌鹿鳴牽絲作宰視

草為郎黃圖樹屏儷于薇堂

天子是葵殊渥超拜紅籀碧幢填撫嶺外入奏嘉謨出
承大賚公既莅止綱舉自治薄賦惠商吏畏民懷人不
敢者公乃有為盜先殺人後收貨賄舊染汚俗積不能
改公捕獲之悉沈諸海江則有沱船則有戈商行千里
劃槳而歌頌公之德久而不磨既遷于閩治與粵僅閩
兵易譁教之以整閩俗易囂鎮之以靜公于仕已喜愠
不形扁舟歸第對客一枰宣勞河曲疾疾乃嬰公疎禮

法甯無水旱廚傳雖盈濁醪糲飯不知公者謂公為嫚
公率僚屬見必分曹肺腑之語辭不在多不知公者謂
公為驕公今逝矣還喪厯下我瞻大東老成徂謝舍彼
華堂銜悲長夜公之清忠當代共知吾思他日國史紀
之無徵不信視此誄辭

哀辭

沈武功哀辭

歲在己酉冬予將往濟南友人沈武功送予落帆亭畔

越二年歸里武功偕予登胥山賦聯句詩未幾別去予
留江都武功寄予書將葬其父處士君世涵具狀來請
銘銘未就鄉人自南來則武功以正月癸丑死矣武功
幼遭亂失學九齡始自讀書日記誦萬言長工于詩性
恬澹不樂仕進居父喪盡禮事母至孝卒時年三十沈
氏自南京大理寺卿玄華以廉慎聞其子文琦博洽負
時譽人謂必相繼取科名卒不遇再傳至處士君省試
將見錄矣復擯而武功亦困窮死嗚呼生才實難顧武

功以上世多文采疑天于沈氏獨厚然皆終其身不得志以死至死且天此人事之最悲者爰為辭以哀之武功諱傳弓秀水人辭曰

處賤以為榮遇不詭也豐實而藏華行勿毀也孰是人斯壽止此也妻亡矣遺其穉女親老矣鞠及童孫叔水伊何況甘旨也嗟行之人悲未已也矧在同游識君久也嗚呼欲銘其父而先哭其子也

祭文

弔李陵文 并序

朱子登乎采掠之巔覽大漠之野見有雪山峙乎西北
若出若沒若廬若旅回睇從者忽失其處從者曰是所
謂天山也李陵之臺在焉朱子曰噫嘻有是哉竊嘗論
陵本文士顧以家世為將欲立功殊域方其召見武臺
恥隸貳師軍請得步卒五千自當一隊其才誠有過人
者及兵盡矢窮以身降敵短衣椎結對蘇武泣下霑襟
抑何陋也其身辱名隕亦足為負才喜功者之戒然陵

方降敵隴西士大夫咸以為愧而司馬遷猶力爭以為國
士雖大節如武終不以衛律遇之交好尤篤則其情有
可矜者也河梁之詩為五言所自始使得一鳴鑣歌郊
祀之盛庶幾史克正考父之美復見于漢乃委之漠北
幸而武奉使倡和之詩得復流傳于世迨武既歸其悲
惋無聊之思必有甚于平昔者登臺而望豈乏感時懷
友之作惜乎不傳者蓋已多矣自古愛才之主宜莫如
漢武然其所好特司馬相如靡曼之詞枚臯東方朔俳

諧之體以遷之文陵與武之詩獨未聞有稱焉至栢梁
既成賦詩高會當極一世之選乃所與賡歌颺言則衛
青輩一二麓豪武人及大官上林丞刀筆俗吏八九而
已此何為者耶賈生之才文帝不善用之為世所惜若
武帝之于陵用違其才殆又甚焉嗚呼才士之不遇于世
自古然矣爰命從者酌之以酒而為文吊之其辭曰

入雲中而四望兮路百折以登危
眇絕漠之驚塵兮悼失身于騫期
嗟平城之構患兮三十萬其莫支
曾不念

祖父之數竒兮丕大賢于武臺以五千當萬騎兮固宜
心一而不離何女子載于行間兮將在軍而不知儒生
不可使即戎兮妬人不可與謀無援師以委敵兮何百
口之足讐死既愧成安兮生復慚乎浞野憾因杼之妄
言兮遂投杆于謀者前奚侯使上坐兮後丁靈之嘲我
殺身既難能兮寧歸國之不可斧冰以為耒兮續帶以
繩瞻畢昴于南街兮望天漢之東傾朝忽忽其就暮兮
夜迢迢而獨興雖永絕于君親兮尚見思于友朋刀鐔

既違願兮何故鄉之足慕驅索駝于羗牛兮獵霜禽與
秋兔登荒臺之負絕兮送故人于長路舞短服于樽前
兮聽悲歌其如訴身雖陷沙漠兮盟未忘乎曹柯歎形
迹之長乖兮豈忠信之可訛居殊域而心故都兮夫孰
明子之無他彼河梁之高倡兮麗五字而為詩感杜甫
之遺言兮謂二子其吾師斯人不可作兮大雅其衰才
士自古而失職兮奚吾生之足悲

告江神文

年月日具官某謹以剛鬣柔毛香帛之儀致祭于大江之神曰某欽承

上命主試江南自誓此心澄同江水惟神昭察濟以安瀾如其寸衷有昧徇人賄託廢棄真才神靈有知允當罰殛復

命渡江甘糝魚腹以為後鑒謹告

貢院誓神文

年月日具官某等敢告于天地神祇先師孔子之前曰

某備官禁近

皇上拔于衆中俾典試事

主恩深重惟有同事一心攬真才以佐盛治

命下之日師友親懿一概屏絕今入棘闈用白于神如
或心存曖昧遏抑真才徇一人之情面受一言之賄託
通一字之關節神奪其算鬼褫其魄五刑備其體三木
囊其頭刀斧分其尸烏鳶攫其肉矢言之出百神共聞
謹告

祭孫侍郎文

公之歷仕記則有史公之生平藏則有銘我姑略焉詳
公交情往歲丁未我未公覲公獲我詩賓座賞擊庚戌
八月謁公之堂我祛公攬偕步于廊款語未已旋羅酒
漿自是過從月必三四公召我趨我歸公至嗟世論交
不樂草茅雖在丘園以位自高誰肯忘年撫謙用勞公
以先覺自稱同學題扁見貽竹垞之楮我歸二載公顏
未改仰屋著書一本程朱河淮之議水田之利舍彼薦

紳芻蕘是詢公學不泛攷古能鑒示賓琰玉僉目為劍
彝曰不然作釋圭一篇公書報我謂云可傳歲且更始
祠考亭夫子執柩視壺廢徹而舖公言子去歲必來助
我考之喪見星而奔公命哲嗣馳賻國門書言卧疴未
克躬唁期子重來慮不爾見我時臨發對書載咷朔南
攸隔歲月其惻既達于京公果逝矣不覩公容觀公孫
子回憶公言聲悲益吞僅一人知己而又不存觴酒在
筵挺燭在几我涕有盡我哀何底

祭納蘭侍衛文

嗚呼往歲癸丑我客潞河君年最少登進士科伐木求
友心期切磋投我素書懿好實多改歲月正積雪初霽
紉履布衣訪君于第君情歡劇款以酒劑命我題扇炙
硯而睇是時多暇暇輒填詞我按樂章綴以歌詩翦綃
補衲他人則嗤君為絕倒百過誦之迨我通籍簪筆

朶殿君侍羽林鮫函雉扇或從豫遊或陪曲宴雖則同
朝無幾相見我官既謫我性轉迂老雪添鬢新霜在鬚

君見而愕謂我太臞執手相勗易憂以愉言不在多感
心傾耳自我交君今逾一紀領契披襟敷文析理若苔
在岑若蘭在沚君於儒術繁學博通文詠書法靡有不
工喀爾庫庫富珠哩朮暨薩都拉未知孰雄君之勇略
侍

帝左右騎則蕭雲射必穿柳出師絕漠不憚虎口乃眷
帝心倚毗良厚當其奮武不知善文及為文辭不知能
軍允矣君子才實逸羣隨陸絳灌異於前聞和氣婉容

承顏以孝友于昆弟古昔是做謙謙者守溫溫者貌逆
之勿恚順之無傲花間草堂淥水之亭有文有史有圖
有經炎炎者進或鍵而扃縫掖之來君眼則青浮醪于
觚盛倉以筆夜合惺忪花散籤帙聯吟比調曾未旬日
詩朋尚在忽焉輟瑟爨尊月朔謂君尚生問疾而止入
巷心忤復者在屋升自東榮魂招不來躑躅屏營寢門
既哭容車將騁大泉一枚蠟燭一挺侑以荒辭泣下如
縷靈兮有知痛無不省嗚呼尚饗

祭劉太夫人文

嗚呼太君其德柔色斯愉也孝以為婦而順以承夫
也以嚴則母慈則姑也卑尊長幼咸克有孚也樂善之
勤靡終初也相少保公之起家縣令而躋尚書也太君
于時挽鹿車也千里之行奉板輿也在汾之陽在浚之
都也錦軍之城白門之解往必俱也總師于邊贊中樞
也耆德既隆壺範益攄也九伐司馬五教司徒也三典
司寇進三孤也禴翟之榮錦韜象軸貢于閭也公沙六

龍皆民譽也其三同懷二入翰苑女封夫人則鳳雛也
孫曾則百誥揖揖螽斯如也爰自侍郎公之填撫宛
青徐也河山十二極海隅也沈寃之獄減其辜也敝邇
之民緩其逋也災傷之地蠲其租也賑者累萬必及其
孥也是乃奉太君之教以成公之計謨也蓋太君之仁
匪特下及家人子姓而已凡賓客之至問所須也及饌
遺所無也貸者無不輸也惠心淑問難悉數也嗚呼太
君貴矣富矣昌矣大矣壽矣康矣榮矣哀矣稽之于古

殆莫與之符也某等從侍郎公遊歷下獲拜太君于堂而忽聞長逝誠不禁涕泗之霑裾也牲之醢也酒之醺也盤有果而俎有胾也跽陳于筵几之前念德容之如昨而不可覩矣為文告哀冀靈之式鑒而享此肴蔬也

祭黃母周孺人文

嗚呼孺人嫁不必鄉里寓公是歸產不必多男有子而才當其相夫子而仕也六館四門教胄子也監丞之賢孺人為之耦也及其殞所天而孀也慈闈之訓兼義方

也徵君之賢孺人成其名也嗟世營營聲利是求維孺
人之德安貧勿憂餐以菽水不事鼎鉶服以縞綈不事
玉錦古聖微言載在六經有圖有史百氏縱橫香廚祕
閣易散難并監丞耽讀廣為探纂徵君益之凡八萬卷
朝哦夜誦孺人佐之機紱之聲徹于書帷歲著雍敦牂
閏月修竊我辭白門言歸柴辟徵君邂逅周在浚之宅
時鶴書初下有司敦迫人為君喜君感其額匪榮名是
逃念母氏兮劬勞商秋乃發達于燕郊陳情之語僅徹

東曹哀訃忽至杖桐而號見星斯奔過市則哭觀者道
旁屏營躑躅矧在彝尊猶子情親惟堂未拜漬酒遙陳
臨風涕泗愧告哀之不文嗚呼尚饗

曝書亭集卷八十

欽定四庫全書

曝書亭集附錄

翰林院檢討朱彝尊撰

葉兒樂府

折桂令

正宮

閨紅塵袞袞公侯白壁黃金肥馬輕裘蟻陣蜂衙鼠肝
蟲臂蝸角蠅頭神仙侶淮王雞狗衣冠隊楚國獼猴歸
去來休選个溪亭作伴沙鷗

又

故鄉人千里書投漁弟樵兄盼我回舟老僕長鬢侍兒
赤腳穉子蓬頭迺新雨過時插柳揀綠陰深處騎牛歸
去來休二頃秫田一簣糟丘

又

挂輕帆潞水春流夾路煙花直下揚州第二泉邊第三
船裏第四橋頭喚十五女青蛾對酒點兩三條紅蠟藏
鉤歸去來休老子尊前最愛歌喉

又

近南湖結个書樓橋影前溪塔火中流梅蕊衝寒荷香
銷夏楓葉鳴秋松樹底一壺村酒柳陰中幾隻漁舟歸
去來休典我春衣日日郊游

又

問先生老矣何求一片西山幾載勾留獻賦長楊挂冠
神武捐珮瀛洲也曾簪筆點螭坳右手也曾移家住鼇
禁東頭歸去來休閒把君恩說與朋游

天淨沙

一行白鴈清秋數聲漁笛
葦洲幾點昏鴉斷柳夕陽時
候曝衣人在高樓

水仙子

雙調

昏鐘百八戍樓馱旅夢三千鄉路饒平頭六十今年老
算不如歸去好得逍遙且自逍遙閒摘朶山花簪帽緊
隨身村沽滿瓢醉拖條竹杖過橋

又

半湖山上采樵夫百步橋邊垂釣徒
三家村裏耕田父
這生涯都不若要歸與只便歸與錦屏風
蒼厓紅樹白
雪灘金疊玉鱸綠楊灣赤米青菰

又

為毛大可輓姬人曼珠豐臺花匠女也

玉堂傳說小名兒擅板能歌絕妙詞銀鈎會寫相思字
記人扶拜客時勝豐臺一捻花枝留客住豪端染紙想
夫憐箏柱調絃今日箇長恨題詩

沉醉東風

香茅屋青楓樹底小蓬門紅板橋西雖無蕉芋田也有
桑麻地野薔薇結箇芭籬更添種山茶綠萼梅這便是
先生錦里

又 題周編修漁隱圖

橈頭船茶壚酒盞藕苗衣筍笠筠竿撈鰕柳樹陰放鴨
蘆花岸畫圖中儘自消閒縱使君思未許還終不學鋪
眉苦眼

清江引

西風古寺攀楊柳落日低銜岫山行萬里程水次雙江
口雁兒不求魚定有

普天樂

中呂

小樓前疎林外爰基丹井顧况書臺灣灣綠水深點點
青山倭釣侶詩朋看都在把封泥酒壘齊開雞頭竹胎
穀芽餅餃油菜花臺

又

到清秋開家宴生漁切玉野雀披絲村村蘄蟹肥日日

湖菱賤對竹千竿書千卷悶來時刻箇花船白蓮寺前
青陽橋外金粟山邊

朝天子

送分虎南還

驢車慢些小住長亭者疎林不隔遠山遮幾點新黃葉
雲脚天斜雁書橫寫趁歸人南去也離別漫嗟只可惜
中秋月

又

魚標稻苗爭似南湖好月寒沙柳夜蕭蕭帆影邛三姑

廟暗水橫橋矮屋香茅看黃花都放了
絲絛布袍再不想長安道

又送融谷宰來賓

第絃酒船且緩坐紅亭勸仙鳬飛度鷓鴣天
種柳濱江縣木榭花邊柑子堂前算輕輶
道六千涼煙暮蟬話十里河橋遠

又

花時荔支日日堆江市石牙山翠雨絲絲
榕葉交廳事

萬里相思六六魚兒盼雙雙新燕子清詩小詞帶幾箇
平安字

同作

洪昇

駐鵲鷓鴣啼徧枕柳樹鬱金香散雨如酥村社敲銅
鼓退食公餘岸幘升車向青山閒弔古男巫女巫酌
酒拜劉因戶

前題

徐善

極遠窮邊飛不到衡陽雁牂牁江上伏波船遙把才

人餞桂葉青圓蕉實黃鮮荔支林紅萬點菖仙鮑仙
天付與丹砂縣

前題

龔翔麟

雷江瘴鄉到日官梅放訟庭無事畫簾張沉水煙初
颺醒酒茴香消食檳榔緩平湖菱芡想琴堂笛狀咏
不了蠻花樣

落梅風

查山探梅

十里青苔路三更翠羽啼泛輕船太湖邊樣等南枝北

枝花放齊也未必明朝起風

又

細細香苗綻冷冷淺水流趁快雪乍晴時候把短簫橫
笛催上樓對七十二峯行酒

金字經

憶辰娘作

蝴蝶難分隊駕鸞擬作雙行近秋花六扇牕剛迴身避
乳籠新霜降紅葉溼鞦韆幫

又

碧浪湖邊樹白蘋江上舟風雨蕭蕭不耐秋愁歸帆那
外抽從別後無計再勾留

山坡羊

雙林菴

涼雲池面殘陽臺殿綠槐不吐青蟲線開河淺寺門偏
蹇驢斜背風中緯可惜馬蹄歸路遠船橋那邊蓮紅一
翦

又 飲池上

昏鴉初定涼蟬都靜絲絲魚尾殘霞刺渚煙冷露華凝

香蒲笑卷青荷柄我醉欲眠君又醒
簾內聲燈花外影

醉太平

野狐涎笑口蜜蜂尾甜頭人生何苦
關機謀得抽身便
抽散文章敵不過時髦手鈍舌根
念不出摩登咒窮骨
相封不到富民候老先生去休

一半兒

西溪商調

滿林殘雪碧山拗人日春風金剪刀
孤棹野塘紅板橋

玉梅梢一半兒開遲一半兒早

又 靈隱

冷泉亭子面山崖蕭九娘家沽酒牌壇畔碧桃花亂開
到重來一半兒依他一半兒改

又 淨慈

冷雲山寺畫屏秋斷塔雷封殘照留孤汊酒村風帆收
載歸舟一半兒蓮蓬一半兒藕

又 西湖

三潭新月浸魚天十里長堤飛柳絲尋到水仙王廟邊
裏湖船一半兒剛來一半兒轉

又 浙江

鯉魚風起鳳山根白鷺潮來鷺子門黃雀雨晴魚浦村
亂帆分一半兒天斜一半兒穩

又 釣臺

渚蘋山木古祠秋漁子衆師樣小舟爭道客星天上留
契相投一半兒君臣一半兒友

又長山瀧

鷓鴣灘冷渚風清謝豹花繁春雨晴烏桕樹翻秋葉鳴
挽船行一半兒山腰一半兒嶺

又九峰

一峰低映一峰高十里沙連十里橋曾記小船迎晚潮
冷蕭蕭一半兒蘆花一半兒草

又虎丘

生公臺上闕茶中短簿祠前羅酒樽真娘墓傍凝舞塵

款游人一半兒櫻桃一半兒筍

又 錫山

錫山泉近筍輿稀竹火鑪輕松葉肥蘭草岸回花舫齊
恣攜歸一半兒香醪一半兒水

又 金山

城頭殘角戍樓開天際征鴻丁字排攜手試登山上臺
暮潮來一半兒江聲一半兒海

又 淮浦

行來沙際柳陰疎望裏村邊酒幔孤聽得渡頭人語無
遠糝糊一半兒吳音一半兒楚

小桃紅

題王元章墨梅

斜飛蝴蝶撲枝圓不怕游絲罥疎影依然水清淺嫩寒
天墨痕澹處珊瑚軟似曾相見稽山風霰一樹小牕前
又送德尹還里

揚州樺子小於龕粉額朱紅檻一路垂楊繫船纜水拖
藍初鴻幾點秋容澹梅花酒酣蘆花風糝夢穩到江南

又前題

謝家兄弟舊田廬好續春池句兒女團圞紙牕戶儘勸
娛閒尋捍海塘邊去村醪遠沽曾船橫渡山似小葫蘆

叨叨令

一年一夢空愁思六張五角難成事千呼萬喚無由至
姑負了燒春酒美文君市悶殺人也麼哥笑殺人也麼
哥相見了只勝常兩個消魂字

又

鳥中歛了煩遮護縞衣借了親分付畫船樣了愁行路
有一日踏花鹿女花間步行不得也麼哥留不住也麼
哥算後會他生未卜今生誤

黃鶯兒

碧玉小人家兩眉彎雙髻了春風愛立疎簾下佳期最
佳陽差不差心知消息今年嫁翦秋紗紗帟合畫画取
並頭花



曝書亭集附錄